

Inatsisartut suleriaasianni § 37, imm. 1 naapertorlugu Naalakkersuisunut apeqquut imaattoq matumuuna saqqummiuppara:

Naalakkersuisunut apeqqutit:

1. Naalakkersuisut paasissutissiissutigisinnaavaat, Københavnimi kalaallit napparsimasut pillugit napparsimasunut siunnersortinik peqalernissaa pillugu siusinnerusukkut nalunaaruteqartoqarsimanersoq? Taamaappat, qaqugu sumilu tamanna nalunaarutigineqarpa?
2. Københavnimi kalaallit napparsimasut pillugit, napparsimasut siunnersortissaannik aaqqissuussinissamut tunngatillugu maannakkut killiffik qanoq ippa, qanorlu aaqqissuussineq atuutilersinneqarnissaa naatsorsuutigineqarpa?
3. Napparsimasut siunnersortissaannik aaqqissuussineq sulii pilersinneqarsimanngippat, suna pissutigalugu sulii pilersinneqarsimanngila, aammalu suut kinguaattoornermut pissutaappat?
4. Napparsimasut siunnersortissaannik aaqqissuussineq atuutilersinneqanngikkallartillugu, Naalakkersuisut qanoq ilillutik qulakkiissavaat Københavnimi kalaallit napparsimasut kiisalu ilaqutaasa pisariaqartitaminnik siunnersorneqarnissamut, ikiorneqarnissamut aammalu ingerlatsinermut tunngatillugu tapersersorneqarnissamut periarfissaqarnissaat?
5. Naalakkersuisut Kalaallit Nunaanni peqqinnissaqarfimmi siunnersorteqarnerup ammasarfiisa sivitsorneqarnissaat aammalu innuttaasut siunnersorneqarnissamut periarfissaasa annertusarneqarnissaat eqqarsaatersuutigisimavaat, matumani nalinginnaasumik allaffiup ammasarfiisa avataatigut siunnersorneqarsinnaanissaq ilanngullugu? Taamaappat, qanoq ittunik aalajangersimasunik eqqarsaatersuutini imaluunniit pilersaarutini peqarpa, taamaanngippallu sooq?
6. Naalakkersuisut peqqinnissaqarfimmi siunnersorteqarnerup pisinnaasaasa nukittorsarneqarnissaat aammalu Kalaallit Nunaat tamakkerlugu innuttaasut peqqinnissaqarfimmi siunnersorneqarnissamut pitsaanerusumik periarfissaqarnissaat qulakkeerniarlugu siunnersortinik amerlanerusunik



**atorfinitsitsinissamik imaluunniit ilinniartitsinissamik pilersaaruteqarpat?
Taamaappat, siunnersortit qassit aaqqissuussinermut ilassutigineqarnissaat
naatsorsuutigineqarpa, qaqugulu?**

(Inatsisartunut ilaasortaq Jens NapātôK', Naleraq)

Tunngavilersuut:

Kalaallit Danmarkimi, pingaartumik Københavnimi, katsorsartikkiartortinneqartut amerlanertigut unammilligassaqartarput. Angerlarsimaffimminnit, ilaquttaminnit aamma ulluinnarni attaveqarfigisartakkaminnit ungasissumiittarput, peqatigitillugulu peqqinnissaqarfimmi allami aaqqissuussaannermilu allaanerusumi ingerlanissaat pisariaqarsinnaalluni. Taamaattumik pingaaruteqarpoq Københavnimi kalaallit peqqissartut peqqinnissaqarfimmi siunnersorteqarnissaannik siusinnerusukkut nalunaarutigineqarsimasup maannakkut killiffia paasissallugu, aammalu aaqqissuussineq suli pilersinneqarsimanngippat sooq kinguaattoortoqarsimanersoq.

Kalaallit Nunaanni peqqissartunut siunnersorneqarsinnaaneq aamma ajornanngitsumik pissarsiarineqarsinnaasariaqarpoq. Peqqissartut ilaquutaasalu siunnersorneqarnissamik pisariaqartitsinerat nalinginnaasumik allaffiup ammasarfiinut killeqanngilaq. Taamaattumik paasineqartariaqarpoq Naalakkersuisut peqqinnissaqarfimmi siunnersortit attaveqarfigineqarsinnaanerisa sivitsorneqarnissaat, nalinginnaasumik ammasarfiit avataanni siunnersorneqarsinnaanissaq, kiisalu siunnersortinik amerlanerusunik atorfinitsitsinissaq imaluunniit ilinniartitsinissaq eqqarsaatersuutigisimavaat imaluunniit pilersaaruteqarfigaat.

Peqqinnissaqarfimmi siunnersorteqarnerup naammattumik sulisoqarnissaa aamma innuttaasut pisariaqartitaannut naleqquttumik pissarsiarineqarsinnaanissaa peqqissartut pisinnaatitaaffiinut, toqqissisimanerannut kiisalu katsorsartinnerminni paasissutissanik eqqortunik paasiuminartunillu pissarsisinnaanerannut pingaaruteqarpoq. Taamaattumik Inatsisartut aaqqissuussinerup maannakkut killiffianik, sulisussatigut pisinnaasaannik aammalu Naalakkersuisut siunissamut pilersaarutaannik erseqqissumik paasissutissinneqarnissaat pisariaqarpoq.



Apequtigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.